

si partir. Scrive, hanno ordinato una cavalcata di stratioti e cavali lizieri verso Bassam et Axolo etc. Sollicitano il mandar di danari per pagar le zente; il provedador Moro mejo.

Di sier Antonio Zustignan, dotor, orator nostro, date in Butistagno, fonno letere. In conclusion, chome li oratori regij li haveano fato intender, non volendo la Signoria li capitoli tratati, la cesarea majestà non vol pato ni acordo alcuno; in conclusion la cossa bateva su Vicenza, chè la voleno. Dil resto si aria acordato etc. Scrive dito orator, il star li è con pericolo etc., unde per colegio poi li fo scritto, si redusesse in loco seguro, e poi l' haria la soa licentia.

Di Sazil, di sier Marco da cha' da Pexaro, podestà et capetanio, et in conformità di domino Antonio Sovergnan, dotor primario, castelan di la Patria. Comme, *juxta* i mandati, adunava li cavali e zente di la Patria, et za era reduto con numero bon a Sazil, et verano verso la Piave per obstar a li inimici et confortar quelli lochi di là di la Piave, stesseno saldi.

223* *Sumario di letere dil provedador Gradenigo, date in Trevixo.*

Letera dada a dì 30, horre 20. Come in campo nimicho tutti parlano di venir soto la terra, dove non è più di 2500 fanti, di qual più di 100 è amalati. Di quelli mandati di Venecia, parte amalati, parte fuziti, parte vendeno malvasie soto tabanelle di galie, et è impossibile a castigarli; chi li caza da una banda, vano da l' altra. De li nobeli, parte è stà messi a le porte, parte a li lochi sospeti e parte vanno a far li squaravaiti, la note, con li condutieri tochano, e lui provedador continuamente, ogni notte, va atorno e torna la matina per non se infidar in alcuno, per aver deliberato, a tuta sua possa varentar quella importantissima cità. Ma bisogna, la guarda di la terra, *ad minus* 4000 fanti boni, e più presto 5000, e non ne hano sani 2000. *Item*, eri sera azonse Batagino con li soi balestrieri, per esser perso Castel Novo è venuto. *Item*, fa provar le artellarie, perhò sentendole non si mareveglj. Scrive, non à potuto la note far eridar arme, per aver auto da far in far partir li alozamenti. *Item*, per letere di la Signoria, come in Seravale è 4 pezi di artellarie, e perhò si vedi mantener quel locho. Il capetanio dice, non saper a che modo, hessendo l'exercito dove l' he. Di novo, lo exercito inimicho è pur a Monte Belluna e in quelle circostantie, ch' è mia 8 lontan di

qui. Dicono, aspetar Maximian, poi vegnirano acamparsi.

Dil dito, a hore 2 di note. Come à ricevuto letere, di 27, vien de li a servir *gratis* domino Francesco Fortunio, dotor, con 5 valenti homeni e ben armati; diman li farà scriver. I nimici sono pur a Monte Beluna. Non è tornato ancora li fanti, andono a tuor Castel Novo; e, per fuziti dil campo, hanno, non esser più artellaria di quanto ha scritto, *videlicet* do canoni et cercha X tra falconeti e sacri. Fanti, fra alemani e francesi, fra 8000, e venturieri assai. Dicono, dano voce esser 1500 lanze, *tamen* si tien, non siano più di 1000. Ha mandato alcuni nostri trombete in dito campo, per intender li andamenti l'horo, con voce di voler venir a questo loco. I nostri stratioti è andati fora per tenir li inimici vigilanti, e sono tornati, e preso 15 in 16 cavali, e cussi spera, ogni zorno farano il simile. E nel campo hanno gran carestia di pan, e ogni giorno vanno pezorando.

Dil dito, di ultimo, hore 17. Come à ricevuto letere dil podestà di Coneian, sier Marzelo, e le manda, al qual à scritto, mandi il canzelier di monsignor de la Peliza, è presom in le sue man, a Treviso, aziò da lui possi intender. Scrive, de li mutano le garde et 4 et 5 man; la note di squaraguaiti vanno atorno, ma li soldati de li sono insolenti molto.

Exemplum.

224

A la guardia de la sarasinescha sono deputati.

El magnifico domino Paulo Valaresso, *cum* fanti XI

Missier Andrea Venier	»	5
Missier Marco de Mezo	»	5
Missier Urban Bollanj	»	5
Missier Francesco Lippomano	»	5
Missier Vizenzo Magno	»	5
Missier Zuam Manolesso	»	5
Missier Andrea da Molin	»	5
Missier Hieronimo Paruta	»	5
Missier Vincenzo Valier	»	5
Missier Valerio Marcello	»	5
Missier Nicolò Pasqualigo	»	5
Missier Zacharia Loredan	»	5

Cadauno de li soprascripti mandar debino de li sui fanti 5 a la guarda de la soprascripta, ad obedientia del prefacto domino Paulo Valaresso.

Summa fanti 71.